


JANAJ PACHAMANTA CAJ YANAPAY



JANAJ PACHAMANTA CAJ YANAPAY

“JANAJ PACHAMANTA CAJ YANAPAY” niska libritopeka Bibliamanta ajllaska yachachiy-cunas cashancu. Santa Escriturasmanta aswan allinta yachachejka Bibliallataj cashan.

Diospa Palabranka “Janaj Pachamanta Jamun”, chaytaj sumajta yanapan pischus Diospa Palabramanta yarkhachicushancu ch’aquichicushancutaj chaycunata. Maypachachus uj juchasapa runa juchanmanta Diosman cutiricun chaypachaka juchasninta khech’upun, Señor Jesucristotataj sonkonman wajyan Pay Salvadornin canampaj, creen-taj chekamanta Jesucristolla Salvadornin caskanta. Señortaj chay creejmanka kopun cusicuyninta, sonko tiyacuynintapis. Nokata ajina pasawarka 1937 watapi, chaymanta pachataj Señorwan nokawan cusca caskaycumantaka mana jayc’ajpis t’akanacor-kaycuchu. Ajinaka kapis manaraj Señorta jap’icunquichu chayka, cunan pacha jap’icuy Cristota c’ata Salvadorniyquipaj jina.

—Watson Goodman (1920-2002)

DIOSPA MUNACUYNIN

Romanos 5:8

Cristorí juchasapasllaraj cashajtincejpis wañupuwarkanchej. Ajinapi Dioska munacuyninta nokanchejman chekata ricuchiwarekanchej. ¡Chayjina munacuyka Diospallata!

Apocalipsis 1:5

Jesucristopis cheka willajmin. Payka wañuymanta ñaupajta causarimojmin, cay pacha tucuy camachejcunaj Camachejnincutaj. Payka nokanchejta munacuwanchejpuni. Yawarninta jich'aspataj wañuyninwan juchasnincejmanta llimphuchawarkanchej.

Juan 3:16

Dioska tucuy runasta maytapuni munacorka. Chayraycumin c'ata Wawanta korka. Cay pachaman payta cachamorka paypi tucuy jap'icojka ama wiñaypaj wañupunanj astawanri wiñay causayniyoj cananj.

Juan 13:1

Pascua ñaupajta Jesuska yachaskaña cay pachamanta ujtawan Tatanman cutipunan hora chayamushaskanta. Payka cay pachapi caj ajllaska runasninta munacorkapuni. Cunantaj chay munacuyninta may jatun caskanta, tucuyta paycunaman ricucherka.

JESUCRISTO DIOSPUNI CASKAN

Mateo 1:22, 23

Tucuy cayka ruwacorka Señor Diospa niskan jun-
t'acunanpaj. Chaytaka unay willajninnejta nerka:
¡Khaway! Uj sipas, mana khari rejsej, wijsalliconka.
Uj khari wawata onkoconka. Payka Emanuel suti-
chaska canka. Emanuel niyta munan: Dios nokan-
chejwan cashan yanapanawanchejpaj.

Juan 14:9, 10a

Jesustaj nerka: —Chhica unayña kancunawan
cani, Felipe ¿manachu rejsiwanqui? Nokata ricuwaj-
ka Dios Tatata ricun. ¿Imaynatataj nishawanqui:
Dios Tatata ricuchiwaycu, nispari? Noka Tataywan
ujlla cani, Tataytaj nokawan ujllamin. ¿Chay nis-
kayta manachu creenquichej?

Juan 1:1 y 14

Kallaricuyipi carcapuniña causayniyoj Niskaka.
Chay Niskataj Dioswan cusca carka Diospuni caspa.
Paymin Jesucristoka. . . . Chay Niska, Cristoka, ru-
naman tucuspa nacecorka. Payri nokaycuwan tiya-
corka. Paypi Diospa cayninta ricorkaycu. Dios Ta-
taj c'ata Wawan caskanraycutaj paypeka Diospa
cayninta ricorkaycu. Cristoka c'acha cayninwan
cheka cajwanpis junt'amin.

JESUSKA DIOSPA CHURIN

1 Juan 4:15

Jesús Diospa Wawan caskanta sut'ita willaj, chay runapeka Dios tiyacushan. Paytaj Dioswan ujchaska cashan.

Mateo 8:29

Chay supayniyoj runastaj khaparispa nerkancu: ¡C'ata Diospa Wawan, Jesús, imaman chapucuwanqui! ¿Manaraj ñac'arinaycu cashajtinñachu ñac'arichej jamuwaycu?

Mateo 17:5

Pedro parlashajtillanraj mana yuyaskamanta ujlliphipej phuyu paycunaman uraycamorka. Chay phuyumantataj Dios Tata parlamushajta uyarer-kancu: —Caymin c'ata munaska Wawayka. Paymanta mayta cusicuni. Payta uyariychej, —nispa.

Colosenses 2:9

Tucuy Diospa caynin Jesucristopi tiyacun.

Lucas 1:35

Angeltaj payman cuticherka: —Santo Espíritu kanman uraycamusonka. C'ata Diospa atiyaintaj kanta c'anchaycamusonka. Chayraycu wawayqueka mana juchayoj, c'acha rejsiska canka, Diospa cheka Wawan.

JESUS NIN PICHUS CASKANTA

Paycunamantaj nerka: —Kancuna cay pachamanta canquichej. Nokataj janaj pachamanta cani. Kancuna cay pacha runaslla canquichej. Nokari sapallay mana cay pachamantachu cani. —Juan 8:23

Jesustaj payman nerka: —Noka cani causarichej. Nokataj cani causayta koj. Nokapi jap'icojka wañunman chaypis causarimonka. —Juan 11:25

Jesusrí paycunaman nerka: —Noka cani chay causayta koj miqhunaka. Nokaman jamojka ni jayc'aj yarkhachiconkachu. Nokapi jap'icojka nitaj jayc'ajpis ch'aquichiconkachu. —Juan 6:35

Kancuna sutichawanquichej, Yachachejniy, Señoñniy, nispa. Chaypuni caskayraycu chekata niwanquichej. —Juan 13:13

Caypi cashanaycamaka cay pacha runaspa c'anchaynincu cani, —nispa. —Juan 9:5

Jesusrí paycunaman nerka: —Chekatapuni niyquichej: Manaraj Abraham nacecushajtin nokaka carkanipuniña, —nispa. —Juan 8:58

Quiquinchanata sut'inchananpaj Jesús nerka: —Chekatapuni niyquichej: Noka cani ovejaspa puncuncu. —Juan 10:7

JESUSPA WAQUIN T'UCUNA IMASTA RUWASKASNIN

Lucas 5:5, 6

Simón cuticherka: —Señorniy, tutantinta sinch'ita llanc'arkaycu nitaj uj challwatapis jap'er-kaycuchu. Chaywanpis niwaskayquiraycu ch'ipasta yacuman churaycusaj, —nispa. Ajinata challwiris ch'ipasta yacuman churaycorkancu. May ashqha challwastataj jap'iskancumanta ch'ipasnincoka lliq'icusharkancu.

Mateo 14:19-21

Chay ashqha runastataj camacherka pastopi tiyaricunancuta. Chanta chay phishka t'antasta iscay challwitastawan maquisninpi jap'erka. Janaj pachaman khawarispataj graciasta korka Diosman. T'antasta challwitastawan partispatataj yachacojcunaman jaywarka. Paycunataj chay ashqha runasman jaywaramorkancu. Tucuynincu miqhorkancu sajsacunancucama. Chay partiskasmanta puchojtaj chunca iscayniyoj canastas junt'araj carka. Chay miqhojcunaka phishka warankajina kharis carkancu. Warmis wawitaswanpis miqhullarkancutaj.

Mateo 20:30a y 34

Ñannejpi iscay ciego runas tiyacusharkancu. . . . Jesusri qhuyacuywan ñawisnincuta llanqharerka. Chay quiquinpacha ricorkancu Jesusta khaterkancutaj.

JESUCRISTOKA TUCUY IMASTA RUWAJMIN CHANTA SEÑORTAJ

Colosenses 1:16

Paynejtamin Dioska ruwarka tucuy imata: janaj pachapipis, cay pachapipis, ricucojcunatapis, mana ricucojcunatapis. Chay mana ricuy aticojcunaka cancuman camachejcuna, capuyniyojcuna, curajcuna, atiyniyojcunapis. Tucuy imata Dios ruwarka Cristonejta, Cristopajtaj.

Hebreos 1:2

Cunan cay khepa p'unchaycunapirí Dios nokanchejman niskanta willawarkanchej Wawan Cristonejta. Paytataj wiñaypaj churarka tucuy ima paypata cananpaj. Yuyaskanmanjinataj Dioska paynejta tucuy pachacuna cajta ruwarka.

Romano 14:9

Chaypajmin Cristo wañorka causarimorkataj camachinawanchejpaj wañuskacunatapis causashajcunatapis.

Juan 1:3

Diostaj tucuy cajta ruwarka paynejta. Ruwaska cajmanta ni imapis canchu mana paynejta ruwaska.

1 Corintios 1:9

Dioska niskasninta junt'anpuni. Paytaj wajyasorkachej Wawan Jesucristo Señorninchejwan ujchaska causacunayquichejpaj.

JESUCRISTOKA TUCUYPA CURAJ CAMACHEJNINCU

Romanos 14:10

Kan ¿imaraycutaj hermanoyquita khawaranquirí?
¿Imaraycutaj hermanoyquita pisipaj khawanquirí?
Jakay jamoj juicio p'unchaypi Diospa ñaupakenpi
tucuy riqhurinanchej tiyan.

Hechos 10:42

Camachiwarkaycutaj tucuy runasman sut'ita willaranaycuta paymanta sumajta parlanaycutapis. Willanaycu tiyan Dios churaskanta Jesusta tucuy runasta khawaspa ninanpaj ruwaskancu allinchus manachus caskanta. Cachun causashajcunapis wañuskacunapis.

2 Timoteo 4:1

Cristo Jesús jamoj juicio p'unchaypi causashajcunatapis wañuskacunatapis juzganka ruwaskasnincumanajina cutichispa. Payka ricuchiconkamin atiy-niyoj camachinanpaj. Chayraycu Diospa, Cristo Jesuspa ñaupakenpi encargayqui.

Romanos 2:16

Jakay jamoj juicio p'unchaypi Jesucristonejta runacunaj pacaypi ruwaskasnincuta Dios sut'inchanka. Sapa ujtataj nenka chekan caskanta chayri jucchayoj caskanta. Chayka sumaj willanasta willaraskaymanjinamin canka.

SALVACIONKA JESUCRISTONEJLLATA

Juan 10:9

Jesus . . . Noka cani cheka puncoka. Diosta rejsinanpaj nokanejta yaycojka allinpi purenka. Yaycuspa llojsispa wiñay causayta koj miqhunata taj tarenka.

Juan 14:6

Jesustaj nerka: —Noka cani chay ñanka, chay cheka caj, chay wiñay causayta kojpis. Runaka nokanejllata taj Dios Tataman jamun.

Juan 8:24

Nerkayquichej, juchasniyquichejpi wañunayquichejta. (Noka Diosmanta jamuni runasta juchamanta cacharichinapaj.) Chayraycu manachus nokapi jap'icuwanchuichej chayka, juchasniyquichejpi wañunquichej, —nerka Jesús.

Hebreos 7:25

Paynejta Diosman kayllaycucojcunapaj janaj pachapi Diosmanta mañapuspa wiñaypaj causan. Chayraycu tucuy atinyoj cashan paycunata juchamanta cacharichinanpaj wiñaypaj mosoj causayniyoj canancupaj.

Hechos 4:12

Chekamanta Jesusllata Dios churarka juchamanta c'ata Cacharichiwajnincej cananpaj. Paynejllata runas wiñay causayniyoj cayta atincu, paypi jap'icuspa. Manamin wajnejtachu, —nispa.

SALVACIONKA JESUCRISTONEJLLATA

Apocalipsis 5:9

Uj mosoj taquiyta taquerkancu: —Kanlla chay kelka c'uyuta jap'inayquipajjinaka sellosnintapis quichanayquipajjinaka canqui. Kanka wañuchiska carkanqui. Ajinapi yawarniyquiwan runaspa juchasnincuta wiñaypaj llimphucharkanqui Diospata canancupaj. Tucuy ayllumanta, tucuy laya parlayniyojcumanta, tucuy llajtasmanda, tucuy jallp'amanta Diospata canancupaj ruwarkanqui.

Colosenses 1:12-14

Ajina callpachaskas caspamin Dios Tatanchejman graciasta konquichej wiñay causayta jap'ejcunata ruwasuskayquichejraycu. Chay wiñay causayta jap'inquichej c'anchayninpi caj payman t'akaska runasninwan. Dioska juchaj lakha atiyinmanta librawarkanchej. Munaska Wawanpa camachiskanta casunanchejpay churawarkanchej paywan ujchaska causacunanchejpay. Wawan Cristomin wañuyninejta cacharichiwarkanchej juchasninchejta k'alata khechuspa.

Lucas 19:10

Noka, Diospa cachaska Runan, jamorkani Diosmanta chincaska runasta masc'aj juchasnincumanta cacharichejtaj, —nispá.

CRISTOJ YAWARNILLANWAN JUCHASKA LLIMPHUCHACUN

Romanos 5:9

Chayraycu cunan Cristoj wañuyninnejta chekanpaj khawaskas canchej. May astawanraj Diospa c'ajaj phiñacuyninmantapis cachariskas casunchej.

1 Pedro 1:18, 19

Kancunaka unay tatasniyquichejmantapacha manacaj causayta jap'erkanquichej. Yachanquichejtaj chay yankha causaymanta cachariskas canayquichejpaj Dios ranticapususkayquichejta. Kolkepis koripis tucucojllamin cancu. Chayraycu mana chaycunawanchu Dioska ranticapusorkachej, manachayrí Cristoj wañuyninwan. Cristoka mana juchayoj chekanta causarka. Jaywana corderojinataj cruzpi wañuspa yawarninta jich'arka. Ajinapi nokanchejraycu may sumaj precioyoj causayninta korka.

1 Juan 1:7

Cristorí Diospa palabranta casushanpuni. Nokanchej Cristojina ruwasunman chayka, tucuy nokanchej paypi ujchaska uj yuyaylla causacunchej. Chaywanpis Diospa Wawan, Jesucristo nokanchejraycu wañorka. Chay wañupuwaskanchejraycullataj llimphuchaskas cashanchej tucuy imaymana juchamanta.

SALVACIONKA CRISTOPI JAP'ICUSPALLA

Efesios 2:8, 9

Chay c'acha yanapayninnejtamin wañuymanta cacharichiskas carkanquichej Diospi jap'icuspa. Cayrí mana kancunamantachu carka. Diosmin mosoj causaytaka kosorkachej. Manataj ruwaskasmantachu carka ama ni pi jatunchacunapaj.

Romanos 5:1

Cunanka Diospi jap'icuskanchejraycu chekanpaj khawaskas caspa payman allinyachiskas canchej Señorninchej Jesucristonejta.

1 Juan 5:4

Imaraycuchus Diospa cheka wawasnenka cay pachaj sajra cajninta atipancu. Jesucristo Diospa Wawan caskanta jap'icuspa juchata atipanchej.

Juan 20:31

Manachayrí cay waquin ricuchinaslla cay libropi kelkaskas cancu. Ajinapi chayta leespa yachanquichej Jesuska jamunan carka chay Cristo, Diospa Wawan, caskanta. Chayta creespa paypi jap'icuspataj wiñay causayniyoj canayquichejpaj cay libroka kelkaska carka.

Juan 6:28, 29

Chaymanta payta nerkancu: —¿Imatataj ruwanaycu tiyan Diospa munayninmanjina ruwanaycupajrí? —Jesús paycunaman cuticherka: —Diospa munayninta ruwanayquichejpajka paypa cachamuskanpi jap'icunayquichej tiyan, —nispa.

DIOSPA QHUYACUYNIN

Mateo 18:11

Noka, Diospa cachaska Runanka, jamorkani Diosmanta chincaska runasta masc'aj juchasnincumanta cacharichinaypajtaj.

2 Corintios 1:3

Yupaychaska cachun Señorninchej Jesucristoj Tatan Diosnintaj. Payka qhuyacuyniyoj Tatanchej tucuy imapi sonkochaj Dios.

Hebreos 4:16

Ajinamanta mana manchachicuspalla Diospa ñaupakenman kayllaycunachej c'acha yanapayninta jap'icunanchejpaj. Payka qhuyacuyninwan perdonawasunchej pisichicuskanchejmanjinataj yanapawasunchej.

1 Pedro 1:3

Señorninchej Jesucristoj Diosnin Tatanka may jatunchaska cachun. Dioska may jatun qhuyacuyninwan mosoj causayta kowarkanchej. Wiñay causayniyoj cananchejpajtaj Jesucristota wañuymanta causarichimorka. Chayraycu Diospipuni confiacunchej.

Tito 3:5

Mana ima chekan ruwaskanchejraycuchu carka. Manachayrí paypa qhuyacuyninraycu cacharichiwarkanchej mosoj causaypaj juchamanta llimphuchaynejta. Ajinapi Santo Espiritunejta mosojyachiwarkanchej.

DIOSKA WAJYAWANCHEJ PAYMAN RINANCHEJTATAJ SUYASHAN

Mateo 11:28

Juchawan tucuy sayc'uchiska cajcuna tucuy llaquiska cajcunapis nokaman jampuwaychej. Nokataj samarichiskayquichej.

Lucas 14:17

Miqhuna horata camachinta cacharka wajyaska runasman willananpaj: "Jamuychej. Tucuy ima waquichiskaña", nispa.

Juan 7:37

Tucuy chay jatun p'unchaycunamanta khepa caj p'unchayka aswan sumaj carka. Chay p'unchaypitaj Jesuska tucuyta ñaupakencupi sayaricuspa nerka: —Ch'aquichicoj runajina wiñay causayta munajka nokaman jamuchun wiñay causayta jap'inanpaj.

Apocalipsis 22:17

Santo Espirituwan noviawan nincu: —Jamuy. Uyarejka nichun: —Jamuy. Ch'aquichicojka jamuchun. Pillapis munajka wiñay causayta koj yacuta ujjachun khasillamanta.

Juan 13:1

Pascua ñaupajta Jesuska yachaskaña cay pachamanta ujtawan Tatanman cutipunan hora chaya-mushaskanta. Payka cay pachapi caj ajllaska runasninta munacorkapuni. Cunantaj chay munacuyninta may jatun caskanta, tucuyta paycunaman ricucherka.

MANA TUCUYCHU DIOSPA WAWASNIN CANCU

1 Juan 3:10

Atinchej sut'ita rejsiyta Diospata cajcunata supay Satanaspata cajcunatapis. Yachanchej chekan cajta mana ruwajka mana Diospatachu caskanta. Cristopi hermanonta mana munacojpis nillataj Diospatachu cashan.

Romanos 8:14, 15

Ajina Diospa Espiritunnejta pusaska cajcunaka Diospa wawasnin cancu. Diospa wawasnin canquichej Espiritunta kosuskayquichejraycu. Espirituntataj mana manchachicoj camachislla canayquichejpajchu jap'erkanquichej, manachayrí Diospa wawasnin canayquichejpaj. Chay Espiritunnejtataj cusiywan khaparincej: ¡Munaska Tatāy! nispa.

Filipenses 2:15

Ajinapi mana juchachana nitaj pantayniyoj, Diospa wawasnin canquichej. Ajinapitaj mana ch'atanajina causanquichej cay pacha runas chaupipi. Paycunaka k'ewiska yuyayniyoj sajrastaj cancu. Kancunari paycuna chaupipi Diospa c'anchayninwan c'anchashanquichej cay pachapi.

Juan 1:12

Astawanpis tucuy paypi jap'icojcunamanrí atiyta korka Diospa wawasnin canancupaj. Paycunaka Diospa Wawan Cristopi jap'icojcuna cancu.

DIOS NIWANCHEJ MACHACHICOJ UJYANASMANTA

Romanos 13:13, 14

Paypa sumaj c'anchayninpijina allinta purinachej. Manataj purinachu ch'ajwa fiestaspi, ni machaycunapi, ni kenchachacuycunapi, ni millay ruwaycunapi, ni phiñanacuypi, nitaj envidianacuypipi. Astawanrí Señorninchej Jesucristowan ujchaskalla causaychej. Amataj yuyaychejchu cay pacha sajra munayta sajsachiytaka.

Galatas 5:19 y 21

Chaywanpis sajra munayninmanjina causan, chay runaj ruwaskasnenka sut'i rejsiskamin. Caycuna cancu: Kenchachacuycuna, millay ruwaycuna, sajra puriyacuna, ... wajpa imanta munaycuna, runa wañuchiycuna, machaycuna, machaywan mana sajsacuycuna, chayjina juchacunawan. Cayta nerkayquichejña quiquillantataj mayta nishayquichej: Chayjina ruwajcunaka manapuni wiñay causayta jap'enkancuchu Dios camachin: chaypi.

Lucas 1:15

Payta Dios sumajpaj khawaskanraycu. Mana ni jayc'aj ni vinota ni ima machanatapis ujyankachu. Naceuskanmantapacha Santo Espirituwan junt'a canka.

DIOSTA MUNACUNA TUCUY SONQOWAN

Mateo 22:37, 38

Jesuri cuticherka: —Señor Diosniyquita munacunayqui tiyan tucuy sonkowan tucuy causayniyquiwawan tucuy yuyayniyquiwapis. Chaymin Diospa camachiskasninmanta aswan curajtaj ñaupajtajka.

1 Juan 5:9-13

Runaspa willaskancuta uyarispa jap'inchej. Diospa willaskanrí aswan curajmin cashan pay quiquin willaskanraycu. Paytaj sut'ita willan Jesucristo Wawan caskanta. Jesucristopi jap'icojka yachan sonkonpi pay Diospa Wawan caskanta. Imaraycuchus jap'icojpa sonkonpi Dios chayta reparachin. Diospi mana jap'icojri payta llullatajina khawan Wawan Jesucristomanta Diospa willaskanta mana jap'icuskanraycu. Dios willan wiñay causayta kowaskanchejta paypi jap'icojcunaman. Cay causaytaj Wawan Jesucristomanta jamun. Diospa Wawanwan ujchaska cajka wiñay causayniyojmin. Diospa Wawanwan mana ujchaska cajri manallataj wiñay causayniyojchu. Kancuna, Diospa Wawan Cristopi jap'icojcunaman cayta kelkamuyquichej. Munani chekatapuni yachanayquichejta cunan wiñay causayniyojna caskayquichejta.

AMA CH'AUQUEASKAS CAYCHEJCHU

Efesios 5:6

Ama pipis kancunata engañasuchunchu yankha parlaycunawan. Chay parlaycunaraycu Diospa c'ajaj phiñacuynin jamun mana casuocunaman.

Santiago 1:22

Kancunari Diospa palabranta casojcunapuni canayquichej tiyan manataj uyarejcunallachu. Ama pantacuychejchu yuyaspa Diospa munayninta ruwaskayquichejta uyarispallaka.

1 Corintios 6:9b, 10

Ama pantaychejchu. Ni khenchas, ni ruwaska dioscunata yupaychajcuna, ni millaycuna, ni khari-pura cuerposwan juchallicojcuna, ni suwas, ni munapayajcuna, ni machajcuna, ni sajra parlajcuna, nitaj suwaspa runata ñac'arichejcunapis janaj pachaman-ka yayconkancuchu.

Galatas 6:3

Pichari mana cashaspalla jatunpaj khawacunman chayka, chay runa pantacun.

1 Juan 3:7, 8a

Munaska wawasniy, ama sakeychejchu ni pipis pantachisunayquichejta. Chekanta ruwajka chekan runamin, Cristo chekan caskanjina. Juchallishan-puni, chay runari supay Satanasmantamin. Chay supayka kallariymantapacha juchallillanpuni.

JUCHAKA WAÑUYTA APAMUN

Romanos 5:12

Yachanchejjina uj runanejta jucha cay pachaman yaycumorka. Juchanejtataj tucuy wañuncu. Ajinamanta tucuy runaspaj wañuy jamun tucuy runas juchallicuskancuraycu.

Santiago 1:15

Ajinata runa sajra munayninta casuspa juchallin. Junt'acojtintaj pay wiñaypaj wañunan tiyan.

Apocalipsis 21:8

Astawanrí manchachicojcunalla, nokapi jap'icuyta mana munajcuna, millay causajcuna, runata wañuchejcuna, kenchachacojcuna, laykacuna, ruwaska dioscunata yupaychajcuna, tucuy llullacojcunapis —tucuy paycunaka azufrewan laurashaj nina kochaman renkancu. Chayka iscay caj wañuyñamin, —nispa.

Romanos 6:21

Chay ruwaskasniyquichej ¿imata kancunapaj ruwarkari? Ni ima allintapis. Astawanrí cunanka p'enkachisunquichej. Chay ruwaskasmantataj runaka wiñaypaj wañun.

Romanos 8:6

Chay sajra munaymanjina yuyaymantaka wiñay wañuymin jamun. Santo Espiritumanjina yuyaymantataj wiñay causay allillanpi tiyacuywan jamun.

CRISTO WAÑUYTA ATIPAN

Lucas 7:14, 15a

Chimpaycuspa Jesús wantunata llanqharerka. Apaj runastaj sayarkancu. Chanta Jesús nerka: —Joven, kanta niyqui: Jataricuy, —nispa. Wañojka tiyaycacamuspa parlayta kallarerka.

Apocalipsis 1:18

Causaj caj cani. Wañuska carkani, cunantaj wiñaypa wiñayninpaj causaj cani. Wañuyniywan juchata khechuskayraycu nokalla wañuytawan infiernotawan atiparkani. (Atipaskayraycutaj wiñay causayta konaypaj atiyniyoj cani.)

Juan 10:17, 18

Nokaka causayniyta wañunaypaj churani. Ujtawantaj causarimusaj ovejasniyta michinaypaj. Chayraycu Tatayka munacuwan. Causayniytari ni pi khechuwanchu. Manachayrí munaynillaymanta causayniyta churacuni. Atiyniyojtaj cani causayniyta churanaypaj ujtawan jap'icapunaypajpis, Tataypa niskanmanjinamin, —nerka Jesús.

Juan 11:43, 44

Chayta niytawantaj jatunta khaparerka: —Lázaro, llojsimuy, —nispa. Wañuska runataj llojsimorka, chaquisnin maquisnin mayt'uska, uyanpis maychus p'ampanapaj khataska. Jesustaj paycunaman nerka: —Phascaraychej, sakeychej rejta, —nispa.

DIOSPA CAMACHIYCUNASNIN

Juan 13:34

Uj mosoj camachiskata koyquichej: Kancunapura munanacuychej. Imaynatachus nokapis munacorkayquichej quiquinta kancunapis munanacuychej.

Marcos 10:17-21

Jesús wasimanta llojsispa ñanpi cashajtinña uj runa correspa paypa ñaupakenpi konkoricorka. Taporkataj: —C'acha Yachachejníy ¿imatataj ruwanay tiyan wiñay causay chayaketa jap'inaypaj? Jesustaj payman nerka: —Dioslla c'achaka. Chanta kanka ¿imaynapitaj noka c'acha caskayta niwanquirí? Yachanqui Diospa camachiskasninta: Ama khenchachacuychu; ama runata wañuchiychu; ama suwaychu; ama llullacuspa runamanta willaychu; ama pacaymanta runamanta imantapis khechuychu; tatayquita mamayquitapis casuy, —nispa. Runarí nerka: —Yachachejníy, tucuy cay Diospa camachiskasninta wawamantapacha casorkani, —nispa. Jesustaj payta khawaycuspa munacorka. Paytataj nerka: —Uj imallaña jarc'asunqui. Ripuy, tucuy capuyniyquita vendemuy, kolketataj wajcha runasman jaywaramuy. Ajinapi khapaj capuyniyqui janaj pachapi canka. Chanta nokawan jamuspa yachacojniy cay, —nerka Jesús.

MANA PIPIS DIOSMANTA PACACUYTA ATINMANCHU

1 Corintios 3:20 y 4:5

Nintaj: “Señor yachan yachaysapacunaj tanteyacuskancoka yankha caskanta.” . . . Chayraycu ama ni imatapis khawaraychejchu manaraj Señor jamushajtenka. Pay jamuspa lakhapi pacaska imasta c’anchayman orkhonka. Sapa uj runaj sonkonpi yuyaskantataj sut’inchanka. Chanta sapa uj runata ruwaskanmanjina Dios mentanka.

Hebreos 4:12, 13

Chekatapuni Diospa niskanka causayniyojmin pay causayniyoj caskanraycu. Atiyniyojtaj cashan, puraj filoyoj espadamanta aswan filotaj. Chay niskanka espadajina t’ujsiycun sapa uj runaj uqhu yuyayninman munayninmanpis, yachananpaj Diosmantachus chayrí cay pachamantachus caskanta. Reparachintaj sonkoj tucuy unanchayninta munaynintapis. Diospa khawayninmataka ni imapis pacaskachu. Astawanpis tucuy yuyayka sut’i, k’ala, quichariskajinatajmin paypa khawayninpajka. Nokanchejpis paypa ñaupakenpi cuentata konanchej tiyan.

Lucas 8:17

Ajinallataj Diospa niskanwan cashan. Waquin runaspajka pacaska cashan. Nokarí reparanancupaj yachachispa Diospa niskanta sut’inchashani.

JUCHASAPAKA WIÑAY CHINCAYMAN RISHAN

Mateo 25:46

Chayraycu kancunaka wiñay ñac'ariyman riychej. Chekanta ruwaj runasrí wiñay causayniyoj noka-wan cankancu.

Mateo 13:41, 42

Noka, Diospa cachaska Runan, angelesniyta cachamusaj. Maypicha camachini, chaymanta orkhonkancu tucuy pantachej, sajrata ruwaj runasta, Diosta mana casojcunatapis. Paycunata laurashaj uqhu pachaman wijch'uyconkancu. Chaypitaj chay runaska jatun nanaywan manchayta wakankancu, phutiywan quirusnincutapis c'aruconkancu.

2 Pedro 3:7

Cunan tiempo cielowan cay pachawanpis quiquin niskallanwantaj ninapi tucuchiska canka. Juicio p'unchaypaj jallch'aska cashan. Chay p'unchaypitaj Dioska mana casoj runastaka wiñaypaj wañura-chenka.

Mateo 18:8

Maquiyquichus chayrí chaquiyquichus juchaman urmachisunquiman chayka, qhuchurpacuspa wijch'uy. Ñuc'upis chayrí ch'ulla chaquiyojpis wiñay causayniyoj canayqueka aswan allinpuni iscaynin maquisniyoj chayrí iscaynin chaquisniyoj uqhu pacha ninaman wiñaypaj wijch'uska canayquimantaka.

DIOSPA JASUT'IYNIN JAMUSHAN

2 Pedro 2:9

Señorninchejka yachan payta yupaychaspa causasajcunata llaquiyanta orkhoyta. Yachantaj sajra ruwajcunata ñac'arichiyta juicio p'unchaypaj.

Hebreos 9:27

Runaka uj cutillata wañun. Chaymantataj ruwas-kasninmanta Diospa ñaupakenpi cutichinan tiyan.

Hechos 17:31

Imaraycuchus Dioska uj p'unchaytamin churan. Chay p'unchaypi tucuy runasta khawanka ruwas-kancuta ninanpaj juchayojchus manachus caskancuta. Chayta chekanta ruwanka paypa ajllaskan Jesu-cristonejta. Dios tucuyman sut'ita ricucherka Jesús ajllaskan caskanta payta causarichimuspa, —nispa nerka Pablo.

Romanos 14:12

Ajinaka sapa uj nokanchejmanta Diosman ruwas-kasninmanta cuentata konka.

2 Corintios 5:10

Yachanchejjina tucuy nokanchej Cristoj ñaupakenman presentacunanchej tiyan. Chaypi sapa ujninchejman cay pachapi ruwaskanchejmanjina pay kowasun. Allin ruwaskanchejmanjina chayrí mana allin ruwaskanchejmanjinapis jap'isunchej.

JESUCRISTOJ QHUYACUYNIN

Romanos 9:16

Chayraycu Diospa yanapaynenka mana runaj munayninmantachu nitaj runaj ruwayninmantachu. Manachayrí Diospa qhuyacuyninmanta.

1 Pedro 5:5b

Yachanquichej Dioska jatunchacojcunaj contranpi churacun. Llamp'u sonkoyojcunatatataj qhuyacuyninwan yanapan.

Romanos 5:15

Paynejta Dioska ashqhasman munacuyninta ricucherka. Astawanka aswan jatunmin Diospa c'acha yanapaynenka Adanpa juchanmanta niskaka. Chay mana casuskan juchamanta tucuy runas wañuncu. Diosrí may astawanraj c'acha yanapayninta mana mich'acuspa kowarkanchej Jesucristonejllata.

2 Corintios 8:9

Chaytataj niyquichej Señorninchej Jesucristoj c'acha yanapayninta rejsiskayquichejraycu. Payka janaj pachapi khapaj cashaspapis kancunapaj wajcha runaman tucorka. Wajchayacorka chay wajcha cayninnejta kancuna c'acha yanapayninwan khapajyachiskas canayquichejpaj.

2 Corintios 9:15

¡Diosman graciasta kona mana yuyay atina koskanmanta!

JUCHAMANTA T'AKACUSPA DIOSMAN CHIMPACUY

Hechos 17:30

Unay runas Diosmanta mana yachashajtincupis pay yuyarka mana jasut'inanta ruwaskancumanjinaka. Cunanrí tucuy runasta tucuynejpi camachin juchancuta sakespa payman cutiricapunancuta.

Lucas 13:3

Chekamanta niyquichej: Sajra ruwaskasniyquichejta sakespa Diosman cutirinayquichej tiyan. Chayta mana ruwawajchej chayka, Dios tucuy kancunatapís tucuchillasonkachejtaj.

Hechos 3:19

Chayraycu juchasniyquichejta sakespa Diosman cutiricapuychej juchasniyquichejmanta llimphuchaskas canayquichejpaj. Chanta Señor Dios sonkosniyquichejta callpachasonkachej cusiskas causanayquichejpaj.

2 Corintios 7:10

Astawanpis Diospa ñaupakenpi phuticuyka payman cutirichiwanchej juchamanta cachariskas cananchejpaj. Chaymantataj mana phuticuy canchu. Astawanrí cay pacha phuticuymanta wiñay wañuy jamun.

Mateo 3:2

Nerkataj: —Diospa ajllaskan camachinanpaj chayamunña. Chayraycu juchasniyquichejta sakespa payman cutiriychej, —nispa.

JUCHASMANTA PERDONASKA CAYMANTA

Mateo 6:14

Kancunaman juchata ruwasojcunata perdonaspa konkapuwajchej chayka, janaj pacha Dios Tatayquichejpis juchasniyquichejta perdonaspa khechusonkachej.

Juan 8:11b

Jesusri payta nerka: —Ni nokapis kanta juchachaskayquichu. Ripuy, amañataj cunanmanta juchallicuychu, —nispa.

Hechos 5:31

Payta jatunchaspataj sumaj atiyuniyoj Camachej cananpaj churarka, juchamanta Cacharichejpis cananpaj. Chayta Dios ruwarka Israel llajta-masisninchej juchancuta sakespa payman cutimunancupaj. Ajinapi juchasnincumanta llimphuchaskas cayta atincu.

Apocalipsis 3:20

¡Reparay! Noka runata wajyashani. Sapa uj wajyaskayta uyarispa sonkanta quichariwajmanka yaycumusaj. Paywantaj ujchacusaj. Paytaj nokawan ujchaconka.

Marcos 2:5

Jesuska cayta ricuspa repararka paycuna tucuy sonkowan creeskancuta onkoskata pay thañichinanta. Chayraycu runaman nerka: —Wawáy, juchasniyqui kanmanta khechuskaña, —nispa.

MUNDOJ CUSICUYCUNAS- NINMANTA T'AKASKA CAYMANTA

Colosenses 3:2

Janaj pacha imaspipuni yuyaychej, amataj cay pacha imaspeka.

Tito 2:11, 12

Diospa c'acha yanapaynenka ricuchiskañamin. Chaymin imaymana runata juchamanta cacharichin. Chay c'acha yanapaynin yachachiwanchej khesachananchejta sajra yuyayta, cay pacha yan-kha munaycunamanjina causayta ima. Ajinapimin chayta khesachaspa cunan cay pachapi causanchej, c'acha yuyayniyoj, chekanta ruwaspa, Diosta cusichispataj. Cusiywan suyashananchejpuni Jesucristo jatun atiyninwan cutimunanta. Payka jatun Diosninchej Cacharichejninchej.

1 Juan 2:15, 16

Cay pachapi sajra cajcunata ama munacuychejchu nitaj sajra ruway munaycunatapis. Cay pachapi sajra cajcunata munacojka Dios Tatata mana munacunchu. Cay pachapi tucuy sajra cajta munayka sajra cajta ruwaywanka manapuni Tata Diosninchejmantachu. Manachayrí supay Satanasmantamin. Chaycunataj cancu: runaj sajra munaynin, sajra cajta ricuspa munapayay, capuyniyoj caskanmanta manacajta jatunchacuypis.

WATEJMANTA NACESKA CAYMANTA

Juan 10:10

Suwaka runata pantachinallanpaj Diosmanta t'akananpaj, tucuchinanpajtaj jamun. Nokaka jamorkani wiñay causayta ovejasniyman konaypaj. Mana mich'acuspataj causayta kosaj.

1 Juan 2:29

Jesucristo chekan caskanta yachanquichejña. Yachallanquichejtaj pichá chekantapuni ruwajka Diospa cheka wawan caskanta.

2 Corintios 5:17

Pillapis Cristowan ujchaska cajka Diospa mosoj ruwaskanmin. Paypaj tucuy ñaupá cajka chincapunña. ¡Khaway, mosojyachiska chay runaka!

1 Juan 5:18

Yachanchej Diospa wawasnenka manaña juchapajchu causashaskancuta. Diospa Wawan, Cristorí payta wakaychan. Ajinapi supay Satanaska mana imananchu Diospa wawanta.

Juan 3:3

Jesusri payman nerka: —Chekatapuni niyqui: Diosta Camachejninpaj rejsinanpaj uj runa watejmanta naceska canan tiyan, —nispa.

1 Pedro 1:23

Wiñay causaj Diospa niskannejta watejmanta nacecorkanquichej. Chay nacecuyri mana cay pacha runaj nacecuyninjinachu. Manachayrí wiñay causaypaj nacecuymin.

JUCHAPAJ WAÑUSKA CRISTO-PAJTAJ CAUSASPA

Colosenses 3:1

Sichus Cristowan cusca mosoj causayman causarimorkanquichejña chayka, munaychejpuni janaj pacha imasta. Chaypi Cristopis Dioswan cusca camachishan.

Galatas 5:24

Jesucristojta cajcunaka tucuy sajra munaycunata wañucherkancaña, chaycunata sakepuspa.

Efesios 2:1 y 6

Dios mosoj causayta kosorkachej kancuna unay wañuskajina cashajtiyquichej sajra ruwaskasniyquichejraycu juchasniyquichejraycu. . . . Cristo Jesuswan ujchaskata Dioska causarichimuwarkanchej janaj pachapipis paywan cusca tiyaycuchinawanchejpaj.

Romanos 6:11

Ajinallataj kancunapis juchapaj wañuskajina kha-wacuychej juchamanta t'akaskaña caskayquichejraycu. Cristo Jesuswan ujchaskataj Diospaj causaychej.

1 Pedro 2:24

Pay quiquin chacatanapi wañorka juchasninchejta khechunawanchejpaj. Payka wañorka juchasninchejmanta cachariskas chekanta ruwaspa causananchejpaj. Paypa ñac'ariyninwantaj thañichiskas canquichej.

WIÑAY CAUSAYMANTA

1 Juan 5:11

Dios willan wiñay causayta kowaskanchejta paypi jap'icojcunaman. Cay causaytaj Wawan Jesucristo-manta jamun.

Juan 3:36

Wawanpi jap'icojka wiñay causayniyojmin. Wawanpi jap'icuyta mana munajrí wiñay causayman mana yayconkachu. Astawanpis Diospa c'ajaj phi-ñacuynin chay runapaj wiñaypaj cashan, —nerka Juan.

Juan 5:24

Chekatapuni niyquichej: Niskayta tucuy sonko-wan uyarejka cachamuwajniypipis jap'icojka wiñay causayniyojmin. Manañataj juchanmanta jucha-chaskachu canka. Manachayrí wiñay wañuymanta wiñay causaymanña yaycun.

Romanos 6:23

Runaka juchamanta pagotajinamin wiñay wañuy-ta jap'enka. Diosrí c'acha munacuycun Señornin-chej Cristo Jesusnejta wiñay causayta kowanchej.

Juan 17:3

Kan c'ata cheka Dios canqui nokatataj cachamu-warkanqui. Kanta nokatapis rejsispalla nokanchej-wan ujchacuspataj runaka cheka causayman yaycun. Ajina ujchaska caymin wiñay causayka.

WIÑAY CAUSAYMANTA SEGURO CAY

Galatas 4:6

Wawasnin caskayquichejta ricuchinanpaj, Dios sonkoyquichejman Santo Espirituta cachamorka tiyacunanpaj. Wawan Jesús mañacuskamanjina chay Espíritos atiyinwan cusiskas Diosta khaparinchey: ¡Munaska Tatáy! nispa.

Romanos 8:16

Quiquin Espiritu sonkonchejpi willawanchej Diospa wawasnin caskanchejta.

1 Juan 3:18, 19

Munaska wawasniy, chekata munacunanchej allin cajta ruwaspa. Manataj simillawanchu ninanchej munacuskanchejtaka. Ajinata munacuskanchejraycutaj yachanchej Diospa cheka wawasnin caskanchejta. Diosmanta mañacuspataj tucuy sonkonchejwan paypi jap'icunchej.

Juan 14:21

Niskasniyta jap'ispa casojka, chay runalla munacuwan. Chay munacuwaitataj Tatay munaconka. Nokapis chay runataka munacusaj, sonkonpitaj sut'ita rejsichicusaj, —nerka Jesús.

1 Juan 4:13

Dios sonkonchejman Santo Espirituta cachamorka tiyacunanpaj. Chaynejta yachanchej nokanchej paywan ujchaska caskanchejta paytaj nokanchejwan.

CRISTOWAN CAUSAYKA CUSIYTA SONKOMAN APAMUN

Juan 15:11

Chay imasta ner kayquichej nokajina cusiskas canayquichejpaj quiquin cusiyan junt'a canayquichejpajtaj.

Juan 17:13

Cunanri kanman jampushaniña. Cay pachapi cashaspataj cay imasta parlani kowaskayquicuna mayta cusicunancupaj.

Galatas 2:20

Cristopi jap'icuspa paywan cusca chacataskajina carvani. Chayraycu cunanka manaña nokaj atiy-niwanñachu causashani. Manachayri Cristo atiy-ninwan nokapi causashan. Nokari cunan cay pachapi causashaspa Diospa Wawanpi jap'icuynejta causashani. Payka munacuwaruka, nokaraycutaj pay quiquin wañorka.

1 Pedro 1:8

Jesucristota mana ricorkanquichejchu. Astawanpis paytaka munacushanquichej. Nitaj cunanpis payta ricushanquichejchu. Astawanpis paypi jap'icuspa maytapuni cusicushanquichej. Chay cusiyka mana willay atinamin, janaj pacha cusiy caskanraycu.

Efesios 3:17

Cristo sonkoyquichejpi tiyacunanpaj paypi jap'ikuspayquichejnejta. Ajinapitaj munacuypi sumaj sayaskas wiñaskas canquichej.

DIOSTAKA CASUNAPUNI

Romanos 2:13

Uyarejcunallaka manamin chekanpaj khawaskachu cancu Diospa ñaupakenpeka. Manachayrí camachiskasninta casojcunalla chekanpaj khawaskas cankancu.

Romanos 6:16

Cayta sumajta yachanquichejjina: Patronman casunayquichejpaj churacuspaka payta casuspataj camachisnin canquichej. Juchata camachejtajina casuspaka casuskayquichejmanta wañunquichej. Diosta casuspataj chekanta causanquichej.

2 Tesalonicenses 1:7-9

Kancuna llaquichiskacunata taj nokaycuwan cusca Señorninchej Jesucristo samarichiwason, atiyniyoj angelesninwan janaj pachamanta uraycamojtin. Laurashaj ninawantaj riqhurimonka. Señorninchej Jesuska juchasnincuraycu ñac'arichenka sumaj willanasninta mana casojcunata, Diosta mana rejsejcunatawan. Chaycuna wiñaypaj ñac'arichiskas cankancu Señorpa ñaupakenmanta t'akaskas paypa llihipiej atiyinmantawan.

Apocalipsis 22:14

May cusiskas cancu juchasnincumanta llimphuchaska cajcunaka. Ajinapi wiñay causayta koj sach'amanta miqhuyta atenkancu. Chay llajtaj puncusnintapis yaycuyta atenkancu.

CRISTOMANTA WILLANAPUNI

Mateo 10:32, 33

Pichari runaspa ñaupakencupi sut'ita willan noka paypa camachejnin caskayta chayka, nokapis janaj pacha Dios Tatayman willallasajtaj payka nokaj camachiymin caskanta. Pichari runasman nokamanta willanman mana camachejninchu caskayta chayka, paymanta nokapis janaj pacha Dios Tatayman willallasajtaj mana camachiychu caskanta.

Romanos 10:9, 10

Runaspa ñaupakencupichus Jesuska Señorniyqui caskanta willanqui, sonkoyquiwantajchus creenqui Dios wañuymanta causarichimuskanta chayka, pay cacharichisonka. Runaka Diospi sonkonwan jap'icun chekanchaska cananpaj; Jesuska Señornin caskantataj siminwan willacun juchamanta cachariska cananpaj.

Filipenses 2:11

Ajinapitaj tucuy willankancu Jesucristoka atiyniyoj Camachej caskanta Dios Tata jatunchaska cananpaj.

Lucas 9:26

Pillapis nokamanta niskasniymantapis p'enkacunman chayka, nokapis cutimuspa paymantaka p'enkacullasajtaj. Noka, Diospa cachaska Runanka, cutimusaj jatun atiyiniwan, Tatay Diospa atiyinwan, angelesninpa atiyincuwanpis.

SUPAYKA ASWAN JATUN ENEMIGONCHEJ

1 Pedro 5:8

Sumaj yuyaywan causacuychej. Wakaychacuychejtaj contrayquichejpi sayaj supay Satanasman-ta. Yarkhaska leonka miqhunanpaj khaparispa purin. Ajinallataj Satanaspis kancunata wiñaypaj wañuchinapaj masc'ashasunquichej.

Mateo 4:1 y 10, 11

Chanta Santo Espiritoka ch'in lomaman Jesusta pusarka. Chaypitaj supay Satanás imaymanamanta juchallichiyta munarka... Chanta Jesuska payman cuticherka. —Ripuy nokamanta, supay Satanás. Imaraycuchus Dios palabranpi nin: Señor Dios-nillayquita yupaychay. Pay sapallamantaj konkoricuspa casuy, —nispa. Chaymanta supayka Jesusta sakeporka. Yanapaj angelestaj jamuspa Jesusman pisichicuskanta jaywarkancu.

Efesios 6:11

Imaynachus soldadoka makanacuna p'achaswan p'achallicucun atipananpaj, ajinallataj kancunapis Diospa tucuy makanacuna p'achasninwan p'achallicucuychej. Ajinapi supay Satanaspa urmachej sajra yuyaskasninpa contranpi sinch'ita sayayta atinquichej.

IMAYNATATAJ SUPAYTA ATIPASUN

2 Tesalonicenses 2:8

Chanta chay c'ullu, sajrawan junt'aska caj sut'ita riqhurimonka. Paytaka tucuy atiyniyoj Señorninchej Jesús palabranwan wañuchenka. Lliphipiej atiy-ninwan jamuspa payta k'alata atipanka.

Santiago 4:7

Chayraycu llamp'u sonkowan Diostaka casuychejpuni. Supay Satanaspa contranpitaj sinch'ita sayacuychej. Paytaj kancunamanta aykeconka.

Hebreos 2:14

Chay wawasnenka cay pacha runas cancu. Chayraycu Jesuspis paycunawan ujchacunanj runa nacecorka. Wañuyninnejtataj supay Satanasta k'alata atiparka. Chayraycu Satanaska manaña wañuchiyta atinchu.

Romanos 8:35 y 37

Ni imapis Cristoj munacuyninmanta t'akawasunmanchu —ni phutiy, ni llaquiy, ni nac'ariy, ni yar-khay, ni wajcha cay, ni peligropi cay, nitaj wañuchiy chaupipi riqhuriypis. . . . Munacuwanjinchej Cristo-nejtataj tucuy chay imasta atipallanchejpuni.

1 Juan 3:8

Juchallishanpuni, chay runarí supay Satanasman-tamin. Chay supayka kallariymantapacha juchallil-lanpuni. Diospa Wawan Cristorí jamorka chay su-paypa ruwaskanta t'unarasma tucuchinanpaj.

MUNACOYKA, CRISTOJTA CASKANCHEJTA NIN

Juan 13:35

Ajinata purajmanta munanacuspá causajtiyquichej tucuy runas yachankancu yachacojcunay caskayquichejta, —nerka Jesús.

1 Juan 3:14 y 4:20

Cristopi hermanosta munacuskanchejraycu nokanchejka yachanchej mosoj causayman yaycuskanchejta. Ñaupajpi wañuskajina causarkanchej. Imaraycuchus Diospajka hermanonta mana munacojka uj wañuskajina causan. . . . “Diosta munacuni,” nejka hermanontataj chejnin chayka, llullamin. Hermanonta mana munacojka manapuni atinchu Diosta munacuyta. Imaraycuchus hermanonta ricunpuni. Diostarí mana ñawiswan ricuy atinchu.

1 Corintios 13:1

Runacunaj parlaynincupi angelcunaj parlaynincupipis parlayman. Sitajchus Diosta runastataj mana munacuymanchu chayka, khasilla parlayman. Ch’usaj fierro wakan ajina chayrí thanta lata, calancalan, wakaskanmanjina tucuni.

Galatas 5:22, 23a

Espiritunejta Dios wajjina pokoyta pokochin runasninpi: Munacuy, cusicuy, allinta tiyacuy, mana cutichispa muchuy, qhuyacuyniyoj cay, c’acha cay, niskanta junt’aj cay, llamp’u sonkoyoj cay, munayninta camachicoj cay.

JESUCRISTOJ CAUSARIMPUYNIN

Juan 20:26-28

Khepan Domingo ujtawan yachacojcuna chayllapitaj tantacorkancu. Tomaspis paycunawan casharka. Puncustaj sumaj wisk'askas carkancu. Jesusri yaycumorka, paycunaj chaupincupitaj sayaycorka. Napaycorkataj: —Kancunapaj c'acha causay cachun, —nispa.

Hechos 10:39-41

Nokaycu ricorkaycu Jesuspa tucuy ruwaskanta Judea jallp'api Jerusalén llajtapipis. Israelcunataj payta cruzpi chacatachispa wañucherkancu. Quinsa p'unchayninman Dios paytaka causarichimorka. Nokaycu willajcunallaman riqhurichiwarkaycu manataj tucuy runasmanchu. Causarimuskanmanta willanaycupaj Dios unayña ajllacuwarekaycu. Jesús wañuymanca causarimuskanmanta paywan cusca miqhorkaycu.

Romanos 4:25

Juchasninchejraycu Dios payta wañuyman jaywarka. Chekanpaj khawaskas cananchejpajta causarichimorka.

Marcos 16:9

Domingo p'unchayta causarimuspa tutamanta Jesuska ñaupajta Magdala llajtayoq Mariaman riqhurerka. Unayña Galileallapiraj cashaspa Jesuska paymanta kanchis supaycunata kharkorka. Chay carka, chay Mariaka.

CAUSARIMUNANCHEJ CASKANKA, C'ACHA SUYAYNINCHEJ

Mateo 16:21

Chaypachamantapacha Jesuska yachacojcunanman sut'ita willayta kallarerka: —Jerusalén llajtamán rinaypuni tiyan. Chaypitaj israel curajcuna, yu-paychanawasimanta curajcunawan israel yachachej-cunapiwan anchata ñac'arichiwankancu. Paycunaka wañuchi-wankancupis. Quinsa p'un-chaymantataj causarimpunay tiyan.

Juan 5:25 y 27- 29

Chekatapuni niyquichej: Cunanka sumaj p'un-chay chayamunña. Cunanmin noka, Diospa Wawan, chay juchapi wañuskacunata wajyashani. Paycunataj uyariwankancu. Chay uyariwajcunataj wiñay causayniyoj cankancu. Runasta juchayojchus manachus ninaypaj atiytapis kowarka cachaska Runan caskayraycu. Cay niskasmanta amaña t'ucuychej-chu. Cunan chay p'un-chay chayamunña. Tucuy p'ampaskacunaka wajyaskayta uyarispa llojsimonkancu. Sumaj cajta ruwajcunaka wiñay causayman yaycunancupaj jatarenkancu. Manacajta ruwajcunataj juchachaskas canancupaj jatarenkancu.

DIOSPAJ LLIMPHUTA CAUSANA

2 Timoteo 2:21

Chayraycu uj runa chay sajra ruwaycunamantachus llimphuchacun chayka, sumajpaj khawaska chuwajina canka. Señorpa ruwananpaj t'akaska canka, waquichiskataj tucuy sumaj ruwaypaj.

Lucas 1:74, 75

“Enemigosniyquichejmanta cacharichiskayquichej paycunata mana manchachuspa nokata yupaychanawayquichejpaj. Ajinata cusichiwaspachekanta ruwanquichej ñaupakeypi tucuy causayniyquichejpi”, nispa.

2 Corintios 7:1

Munaska hermanosniy, chay sumaj niskasninta jap'iskanchejraycu cuerponchejta sonkonchejtapis tucuy ch'ichichaj imasmanta llimphuchanachej. Ajinamanta Diosta manchachuspa payman t'akaskas llimphu causayta masc'anachej sumaj wiñaskas cananchejcama.

Hebreos 13:12

Ajinallataj Jesuska quiquin yawarninnejta runasninta llimphuchananpaj llajta jawapi ñac'arerka p'enkachiskapis carka.

1 Pedro 1:15

Manachayrí Diosman t'akaska chekanta causacuychej Dios wajyasuskayquichejmanjina. Payka tucuy cayninpi santomin. Ajinallataj kancunapis tucuy causayniyquichejpi santo caychej.

DIOSPAJ LLIMPHUTA CAUSANA

Hebreos 12:14

Tucuy hermanoswan allinpi causacuyta masc'aychej. Diosman t'akaska llimphu causayniyoj cayta tucuy sonkowan munaychej. Llimphu causayniyoj runalla Diostaka riconka.

1 Juan 1:9

Juchasninchejta Diosman sut'ita willacusunman chayrí, juchasninchejta khechuspa konkapun payman allinyaskas cananchejpaj. Imaraycuchus payka chekan, niskantataj junt'ajpunimin. Tucuy sajra cayninchejmanta mana allin ruwaskasninchejmantapis llimphuchawashanchej.

Mateo 3:11

Chekatapuni noka yacupi bautizayquichej Diosman cutiriskayquichejta ricuchinapaj. Khepaytari Diospa ajllaskan Cristo jamonka. Payka aswan curaj atiyniyoj nokamanta niskaka. Mana paypajka (camachinpajjinallapischu cani runalla caskayraycu.) Paymin kancunata bautizaspa Santo Espirituta sonkoyquichejman cachamusonkachej Diosllapaj causanayquichejpaj. Ninawantaj bautizacionkachej.

Efesios 1:4

Yuyayninmanjina manaraj cay pachata ruwashaspa Dioska ajllacuwaranchej, Cristonejta allinyachinawanchejpaj. Munarka payman t'akaskas mana juchayoj munacuypi paypa ñaupakenpi cananchejta.

ESPIRITU SANTOWAN JUNT'ASKA RUNAS

Hechos 1:8a

Kancunapi Santo Espiritu tiyacojtinrí atiyinta jap'inquichej nokamanta willajcuna canayquichej-paj.

Hechos 7:55

Estebanrí sonkonpi Santo Espirituwan junt'a car-ka. Janaj pachaman allinta khawaspataj tucuy atiy-niyoj Diosta ricorka. Jesustataj paywan cusca sayashajta ricorka jatun atiyinwan camachinanpaj.

Romanos 8:9

Kancunari mana sajra munaymanjinachu causashanquichej. Manachayri Diospa Espiritunmanjina causashanquichej sonkoyquichejpi tiyacuskanraycu. Maykenpi mana Cristoj Espiritun tiyacunchu chayka, payka mana Cristojtachu.

Hechos 13:52

Jesupsi jap'icojcunaka Antioquiapi may cusiskas carkancu Dios Espirituwan junt'ataj.

Hechos 4:31

Ajinata Diosmanta wajyacuytawan tantacorkancu, chay waseka qharcatiterka Santo Espiritu chaypi caskanraycu. Tucuy chaypi cajcunataj Espirituwan junt'a carkancu. Chanta Jesuspa cachasnenka Diospa niskanta tucuy sonkowan willarkancu.

DIOS, PROMETEN WAWASNINMAN

Mateo 6:33

Kancunari tucuy atiskayquichejwan llanc'aychej ñaupajta Dios tucuyta camachinanpaj. Ajinallataj Diospa munayninmanjina chekanta causaychej. Chanta payka cay pachapi causanayquichejpaj tucuy imata yapasonkachej.

Mateo 29:20b

Reparaychej nokaka sapa p'unchay kancunawan-puni casaj cay pacha tucucuycama. Ajina cachun.

1 Pedro 4:12, 13

Munacuskasniy, llaquiyacunanejta Dios ricuchenka paypi jap'icuskayquichej chekachus manachus caskanta. Chayraycu nina c'ajayjina llaquiycuna riqhurejtenka ama yuyaychejchu manchay t'ucuna caskanta. Astawanpis cusiyucuychej. Chay pisi llaquinyiquichejwan Cristoj ñac'ariyninpi ujchaskas canquichej. Chaymanjinataj pay atiyinpi cutimojtin mayta cusicunquichej.

Apocalipsis 21:4

Ñawisnincumanta tucuy wakaynincuta Dios pichanka. Runasninpajka wañuypis manaña cankachu. Niñataj ni phutiy ni wakay ni ñac'ariy cankachu. Cunanka manaña ñaupaj caj imas canñachu, —nispa.

Marcos 9:23

Jesusrí payta nerka: —Kan ninqui: “Sichus atinqui, nispa. Noka niyqui, Diospi jap'icojpajka tucuy ima aticun”, —nispa.

DIOS PROMETEN PANTAYMAN URMAJ WAWASNINMAN

Hebreos 2:18

Jesuska cay pacha causayninpi juchaman urmachejcunata ñac'arerka, chaytataj atiparka. Chayraycu juchaman urmachejcunata ñac'arej runasta yanapananj atiynejmin.

Romanos 16:20

Allinyachej Diostaj uskhayta kancunapaj supay Satanasta atipanka sajra cajta sarunayquichejpaj. Señorninchej Jesucristoj c'acha yanapaynin kancunawan cachun.

1 Corintios 10:13

Juchaman urmachejka ni uj ima mana runaj muchunanka kancunata jap'isorkachejchu. Diosri niskanta junt'anpuni. Payka mana sakesonkachejchu muchuyta atinayquichejmanta astawan muchojtaka. Manachayri urmachej imapi ricucojtiyquichejka ñantajina ruwapusonkachej imaynatapis chaynejta llojsinayquichejpaj. Ajinapimin urmachejtaka atipanquichej mana juchallispalla.

Romanos 8:28

Chaywanpis Diosta munacojcunata yuyaskanmanjina wajyarka runasnin canancupaj. Yachanchejtaj Dios tucuy imaymanawan ruwaskanta paycunaj allinnincupaj yuyaskanta junt'ananpajpuni.

DIOS PROMETEN ATIPAJCUNA WAWASNINMAN

Apocalipsis 3:12

Juchata atipajtaka Tatay Diospa yupaychanawa-sinpi mana cuyoj cacunanpaj churasaj. Paytaj ni jayc'aj llojsenkachu. Tatay Diospa sutintataj paypi kelkasaj. Mosoj Jerusalén llajtayoj caskantapis kelkasaj. Chay janaj pachamanta uraycamoj Jerusalenka Tatay Diospa llajtanmin. Nokajta caskanta ricuchinaypaj mosoj sutiya atipajpi kelkasaj.

Apocalipsis 3:5

Juchata atipajka llimphu causaywan p'achalliconka p'achawanjina. Wiñay causayniyojcunaj sutisnincu kelkana libromantapis paypa sutintaka ni jayc'aj pichasajchu. Astawanpis Tatay Diospa ñaupakenpi angelesninpa ñaupakencupipis cheka runaypaj paytaka rejsicusaj.

Apocalipsis 3:21

Nokaka tucuyta atipaskaymanta Dios Tataywan cusca camachinaypaj tiyaycuska cani. Ajinallatataj juchata atipajtaka nokawan cusca camachinanpaj tiyaycuchisaj.

Apocalipsis 2:7

Diospa ajllacuskasninman Santo Espíritu nishas-kanta ningriyoj cajka sumajta uyarichun. Juchata atipajmanka causayta koj sach'amanta miqhuchisaj. Chay sach'aka janaj pachapi Diospa c'acha huertanpi cashan.

DIOS C'AMIN DIVORCIOMANTA

1 Corintios 7:10, 11

Casaraskaña cajcunamanrí camachini, manataj nokallachu, astawanpis Señor cayta camacherka: Warmeka ama kosanmanta t'akacuchunchu. T'akacuspári amaña ujwantaj casaracuchunchu. Manachayrí kosanwan allinyacapuchun. Kosataj ama warminta wijch'uchunchu.

Romanos 7:2, 3

Leymanjina uj casaraska warmipis kosanwan ujchaska cashan causanancamalla. Sitajchus kosan wañupunman chayka, casaraska caymanta libreña. Kosan causashajtillanraj waj kosayoj canman chayka, warmeka khenchapaj rejsiska canka. Sichus kosan wañupunman chayka, manaña paywan ujchaskachu. Leymanjina warmeka mana khenchachu canka waj kosayoj caspapis.

Mateo 5:32

Nokarí niyquichej pichari warminmanta t'akanacuncun mana waj khariwan purejtenka, warminta khenchachachiskanta. Chayjina t'akanaska warmiwan casarajpis khenchachacullantaj.

Lucas 16:18

Sapa khari warminmanta t'akanacuspapa waj warmiwantaj casaracun chayka, khenchachacun. Chay t'akaska warmiwan casaracoj kharipis khenchachacullantaj, —nerka Jesús.

CRISTOJ KHEPA CUTIMUYNIN

Juan 14:3, 4

Kancunapaj waquichej rispa ujtawan cutimusaj kancunata pusacapunaypaj. Ajinaka noka cashani, chaypi kancunapis canquichej. Noka rishani, chaymanka ñanta rejsinquichejña, —nerka Jesús.

Apocalipsis 3:11

Uskhayta jamusaj. Chayraycu nisuskayta casullaypuni atipaskayquimanta jap'inayquita ama chincachinayquipaj.

Mateo 24:30

Chanta noka, Diospa cachaska Runan, jatun ricuchinayta janaj pachapi ricuchisaj. Chaypachatajmin cay pacha tucuy ayllusmanta runaska pechoncuta tacacuspa wakankancu. Nokataj atiywan may lliphipaj c'anchaywantaj jamusaj. Runastaj ajinata janaj pachamanta phuyu patapi cutimushajta ricuwankancu.

Santiago 5:8

Ajinata kancunapis cusiywan suyaychejpuni. Sonkosniyquichejta astawanraj callpachacuychej imaraycuchus Señorninchej cutimuspa kayllamushañña.

Mateo 24:27

Allinta yachaychej: Lliujlliojka inti llojsimuynejmanta inti yaycuynejcama c'ancharejtin tucuy runas ricuncu. Ajinallatataj cutimojtiy tucuy runas ricuwankancu.

CRISTOJ KHEPA CUTIMUYNIN

1 Juan 3:2

Munacuskasníy, cunanka Diospa wawasnin canchej. Manataj yachanchejrajchu imaynachus khepata casunchej tucuy chaytaka. Astawanpis Jesucristo riqhurimojtinrí payjina cananchejta yachanchej. Imaraycuchus pay quiquinta ricusunchej payjinallataj casunchej.

Lucas 12:40

Kancunapis waquichiskas cashaychej. Imaraycuchus mana suyanquichej cutimunayta, chay horatamin noka, Diospa cachaska Runan, cutimusaj.

Hechos 1:11

Nerkancu: —Galilea runacuna ¿imaraycutaj janaj pachata khawashanquichej? Jesuska janaj pachaman okhariskaña, pay quiquin ujtawan cutimonka. Janaj pachaman rishajta ricorkanquichej ajinallataj cutimonka, —nispa.

Mateo 16:27

Imaraycuchus noka, Diospa cachaska Runan, cutimusaj Dios Tataypa atiyinwan cachamuska angelesninwan cusca. Chaypachataj sapa ujman ruwaskanmanjina kopusaj.

Lucas 21:27

Chaymantamin runas ricuwankancu. Noka, Diospa cachaska Runanta, uj phuyupi jamushajta atiyinwan liphipej c'anchaywanpis ricuwankancu.

DIOSPA PALABRAN

Lucas 21:33

Janaj pacha cay pachapis chincaponkancu; niskasniyri junt'aconkancupuni.

Mateo 22:29

Jesusri paycunaman cuticherka: —Kancunaka mana entiendenquichejchu Diospa palabrantanitaj rejsinquichejchu atiyntapis. Chayraycu ancha pantaskas canquichej.

Hebreos 4:12

Chekatapuni Diospa niskanka causayniyojmin pay causayniyoj caskanraycu. Atiyniyojtaj cashan, puraj filoyoj espadamanta aswan filotaj. Chay niskanka espadajina t'ujsiycun sapa uj runaj uqhu yuyayninman munayninmanpis, yachananpaj Diosmantachus chayri cay pachamantachus caskanta. Reparachintaj sonkoj tucuy unanchayninta munayntapis.

2 Pedro 1:21

Dioska ni mayken palabrallantapis runaj munayninmanjinaka sut'inchawarkanchejchu. Manachayri runaska Santo Espirituwan junt'a caspalla Diospa yuyayninta parlarkancu.

2 Timoteo 3:16

Diospa palabranpi tucuy kelkaskaska paymantamin. Chayraycu allinta sirven runata yachachinapaj, juchanta reparachinapaj cheka cajman cutirichinapaj chekan causaypi wiñachinapajpis.

Published in numerous languages by World Missionary Press, Inc.,
as God supplies funds in answer to prayer. **For questions or more
information by country, visit: www.wmp-contacts.org**

Kelkarka: Watson Goodman

Mana vendenapajchu

World Missionary Press
PO Box 120
New Paris, IN 46553-0120 USA
www.wmpress.org



Read booklets online or by App
www.wmp-readonline.org

8-24 116/2 South Bolivian Quechua HFA